

Inisiatif ringan beban 21,898 asnaf di K. Lumpur

Bantuan keperluan asas MAIWP dinaikkan

KOSMO 3/10/2023 M/S: 14

KUALA LUMPUR - Bantuan Keperluan Asasi Majlis Agama Islam Wilayah Persekutuan (MAIWP) dinaikkan daripada RM150 kepada RM300 bermula tahun hadapan selaras dengan peningkatan harga barangan.

Menteri di Jabatan Perdana Menteri (Hal Ehwal Agama), Datuk Dr. Mohd. Na'im Mokhtar berkata, penambahan bantuan itu adalah bagi meringankan beban golongan sasar.

Menurutnya, kerajaan memahami kesulitan yang dihadapi penerima bantuan disebabkan kenaikan harga barangan.

"Pada Februari tahun depan, Bantuan Keperluan Asasi MAIWP akan dinaikkan daripada RM150 kepada RM300," katanya selepas Program Santun Kasih

MAIWP di Perumahan Awam Sri Kota, Bandar Tun Razak di sini semalam.

Mohd. Na'im memberitahu, penambahan Bantuan Keperluan Asasi MAIWP itu membabitkan peruntukan berjumlah RM108 juta setahun dengan kenaikan sekali ganda berbanding tahun sebelumnya.

Beliau memaklumkan, seramai 21,898 asnaf di Kuala Lumpur menerima bantuan sebanyak RM150 sebulan itu yang dikreditkan melalui e-wallet penerima sejak ia dilancarkan pada Januari tahun lalu.

Jelasnya, program tersebut bertujuan bagi membantu asnaf mendapatkan bahan mentah di pasar raya terpilih dan pembelian melalui lori bergerak Mygro-

cer yang turun ke kawasan perumahan yang berbeza pada setiap hari.

Tambahnya, bagi memudahkan penerima bantuan orang kurang upaya (OKU), pasukan brigid terdiri daripada anak-anak asnaf ditubuhkan bagi menghantar barangan keperluan tersebut ke rumah penerima.

"Sebagai permulaan, kita mempunyai seramai 30 anak muda asnaf yang menjana pendapatan sebagai penghantar barangan keperluan ini kepada golongan penerima OKU.

"Program itu selari dengan matlamat Sifar Kelaparan MAIWP bagi membantu meringankan beban asnaf membeli barangan keperluan harian mereka," katanya.



INISIATIF menaikkan bantuan keperluan asas MAIWP pada tahun hadapan dilaksanakan selaras dengan kenaikan harga barangan di pasaran. - GAMBAR HIASAN